

Monday, February 24, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

FINANCIAL LITERACY WEEK 2025

Reserve Bank of India buatsaih, Financial Literacy Week chu “Financial Literacy – Women’s prosperity” tih thupui hmangin vawiin khan Larsap Gen (Rtd) Vijay Kumar Singh chuan a hawng.

Larsap chuan Financial Literacy Week buatsaih ani chu lawmawm atih thu sawiin Sum leh pai enkawl dan dik hriat tawk loh avangin harsatna hrang hrang a tawh theih a ti a, Tunlai khawvelah UPI hmangin pawisa inpek a awlsam tawh a, hemi avang hian pawisa ip atanga pawisa phawrh kherlo in tam tham tak pawisa a hman theih tih hriat a tha a ti a, Sawrkar laipuiin kum 2047-a ram hmasawn a nih tumna – Viksit Bharat ah pawh sum leh pai enkawl dan dik hriat hi ngaih pawimawh ani tih sawiin sawrkar laipui pawhin mipui ban phaka awlsam turin thil hrang hrang a buatsaih thin tih a sawi.

Larsap chuan hmeichhia ten Bank account an neih theih nan leh anmahnia sum an khawl theihna tur hrang hrang sawrkarin a ruahman a ti a, mipui mimir hmasawna chu sawrkar ngaih pawimawh ani tih sawiin hemi ti hlawhtling tur hian Mizoram state chhunga Bank leh Financial Institution zawng zawngte chuan mipuiten Bank an dawr vek theih dan turte, beisei awm ten sum peipun dan leh an khawl theih dan tur kawnga kawhmuhtu ni turin Bank hrang hrang te tan la turin a sawm baw.

(Byte...Governor...43 secs)

Pu T. Lhungdim, General Manager leh Officer-In-Charge, RBI Aizawl chuan Kum 2016 atangin RBI chuan Financial Literacy Week a hman thin thu sawiin hengah hian tum bik neiin, thlan bik mipuite zingah an mamawh zirtirna an pek thin thu a sawi a, a tum ber chu campaign chhunga inzirtirna pek tur bik thupui siamte chu mipuite zinga a tam thei ang ber thehdarh a nih thu sawiin RBI chuan tunkar chhung hian sum leh pai inzirtirna tur thlanbik thupui hmangin theihtawpin Mass Media Campaign hmangin inzirtirna hi a thehdarh dawn thu an sawi baw.



FINANCE COMMISSION CALL ON GOVERNOR

Ni li (4) chhung Mizoram tlawh tura lokal 16th Finance Commission Chairman Dr. Arvind Panagariya leh member dangte chuan nizan khan Larsap Gen (Rtd) Vijay Kumar Singh chu Raj Bhavan-ah kawmin Mizoram tana pawimawh hrang hrang an sawi pui.

He hunan hian Larsap chuan Mizoram state dinhmun zirchianna nei tura rawn tlawhtu 16th Finance Commission Chairman leh member zawng zawngte thinlung taka a lo lawm thu a sawi a. Mizoram tana pawimawh leh tul

hrang hrangte sawipuiin, Mizoramin chhiah lakluh tam loh avangin sawrkar laipua rawtna an thlen hunah pawh hriatthiamna nei turin a chah a ni.

Heng bakah hian Larsap chuan Mizoram chu tlang rama awm a nih avangin hmun dangte aia hmasawnna ruhrel siam a harsat dante a hrilh bakah, thenawm ram buai avanga ralflanin an pan nasat thu leh hemi buaipui kawnga harsatna tawhte a sawi lang bawk a. Mizoram kaltlanga ruihhlo tawlh a hluar nasat avangin hemi do kawngah hmalak nasat a tul tih sawiin, dan leh thupek kenkawh kawnga mamawhte thawmthat a tul hle a ni, a ti a. Airport tihchangtlung chungchang bakah thalaite tana hna tam zawk siam a nih theih nana hmalak a tul thu a sawi bawk.

16th Finance Commission-te hian nimin khan Mizoram lo thlengin Hunthar Veng lei tla hniam an tlawh nghal a. An cham chhung hian Chief Minister, Sawrkar official-te, political party-te, ADC-te, Local Body-te, Trade & Industry leh VC-te an kawm dawn bakah Chanchinbumite an kawm dawn a. Zoram Medical College & Hospital, Falkawn, Thenzawl leh Serchhip te tlawhin Handloom Centre leh hmunhma pawimawh dangte an enfiah dawn bawk a. Zirchianna behchhan hian Sawrkar laipuah rawtna an thlen dawn a ni.

16th Finance Commission atanga lokalte hi Chairman Dr. Arvind Panagariya bakah member dang Pu Ajay Narayan Jha, Pi Annie George Mathew leh Dr. Manoj Panda te niin, official pawimawh dangte'n an rawn tawiawm bawk a ni.



RNU DISCUSSION PRE PUBLICITY

Akashvani Aizawl Regional News Unit buatsaih thupui hrang hrang hmanga mithiamte thusawina hun RNU Discussion ah naktuk chawhnu dar 3 leh a chanve hian Khawtlanga Media pawimawhna sawihona tihchhuah a ni dawn.

Naktuk chawhnua RNU Discussion ah hian Mizoram University-a post doctoral fellow Jenny Lalmuanpuui leh Pu K. Zothanpara, Mizoram Journalists Association General Secretary ten mipuite hriatttur pawimawh tak tak an sawi dawn a, mipuiten thuthar rintlak zawk an hriat theih nan Mainstream media pawimawhna chungchang an sawi dawn a ni.

RNU Discussion hi tun thla February leh thla leh March thla chhunga neih tura ruahman a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



PM

Prime Minister Narendra Modia chuan ni hnih cham turin vawiinah Assam a tlawh dawn. PM Modia hian Guwahati-ah Jhumoir Binandini Programme a hmang dawn a. Advantage Assam 2.0 Investment and Infrastructure Summit naktukah a tel dawn bawk a ni.

Jhumoir Binandini Programme hi Sarusajai stadium ah neih tur niin he hunah hian thingpui huan enkawltu tribal hnam atangin mi 8500 chuangin Jhumur lam an entir dawn a ni.

Vawiin tlai vek hian PM Modia hian Advantage Assam 2.0 Summit atana exhibition a hawng dawn bawk a ni..

